

Gij Gingjsaek Lumj Gojlwgnyez Haenx

童话般的风景



Nae, gou gop mwngz youq ndaw fwngz gou, mbaeumbengmbeng, mbaeumbengmbeng……

Nae, mwngz dwg duj va ndeu, mwngz youh dwg duzmbaj saekhou, mbinfoenfoen coh seizdoeng.

Baenz benq baenz benq naefaiq iq mbinyegyeg doek roengzdaeuj, lumj dwg baenz duz baenz duz cinglingz

cingqcaih diuqfoux nei. De unqnem-nem lax aennaj gou, youh caemrikrik doek youq gwnz deih, hawj daihdeih daenj hwnj geu buh moq hausak ndeu, hawj aenranz daenj hwnj aen mauh hausak ndeu. Naefaiq iq doek youq gwn nyefaex, baenz naed baenz naed baizdoih dwk, dwg mbouj dwg cingq lienh dijcauh ni? Yawj coh gizgyae, gwnz daihloh hausaksak, daj gyae yawj lumj haeuj daengz diegsien fwjhou hopheux ityiengh.

A! Gij nae seizdoeng bineix caen gyaeu ho! Gij yienghceij naefaiq caen lai ha! Miz yiengh va, yiengh roekbien, yienghlimq……. Baezgonq daj gyae-gyae yawj naefaiq cij dwg baenz naed baenz naed iq saekhou, seiz-neix baenzneix gyawj ngonzyawj, gij

yienghceij naefaiq caen gyaeu! Gvaiq mbouj ndaej naefaiq baenzneix simgip mbindoek roengzdaeuj, yienzlaiz dwg siengj yiengq gyoengqvunz langhbaij aennang gyaeuget de ha!

Caiq yawj ndaw hagdangz, gyoengq doengzhag youq itheij doi vunz nae, hoenx ciengqnae, guhcaemz haisim dangqmaz! Gyoengqde ndaw fwngz gaem nae, baenj baenz baenz aen baenz aen giuznae lumj yiengh mandouz nei, swnh bouxwnq seiz mbouj haeujsim, “dug” sing ndeu boemz youq gwnz ndang mbouxwnq. Laeq lwgnyez boemz vunz haenx riugakgak, laeq lwgnyez deng boemz haenx gyajcang fatheiq, da’myonz de song mbat, sikhaek fanjhoenx, song boux couh yienghneix guhcaemz angqvanvan.

Caiq yawj baihaenx, geij boux doengzhag iq caezsim caenhrengz doi aennang vunz nae, youh itheij ringx aen giuznae hung ndeu, cang hwnj aennang vunz nae bae, aeu gaiqgau guh cehda, yienzbit guh aennaeng, caiq aeu mbaw faex ndeu cuengq youq laj ndaeng guh congghbak, ha! Boux vunz nae ndeu couh yienghneix doi baenz lo.

Gou youq gwnz roen iq, baez yamq baez yamq caij nae doxbae, vunqdin baihaeng lumj baenz roix baenz roix yaemfouz saetdoengh, ciengq gij go vuenheij haenx.

Nae, gou yo gij gingjsaek lumj gojlwgnyez mwngz youq ndawsim gou.

(bouxij Lij Binghceij boux-hoiz Goenggen)

Hag Youzraemx

学游泳

Bihaenx sujgyaj, daxboh daxmeh bauqmingz hawj gou hag youzraemx. Daengz guenjoyz-raemx, gyaulen cam gou: “Mwngz miz gingniemh youzraemx lwi?” Gou ndawsim siengj, youzraemx miz maz nanz lo, mbouj couh dwg youq ndaw raemx baeuh raemx ma! Gou daeuj youz hawj mwngz yawjyawj! Gou mbeihung diuq roengz raemx bae. Mbouj liuh daengz gou gingqyienz lumz mbaetheiq, doeklaeng lienz gwn geij gaemz raemx, gaenlaeng deng gyaulen rag hwnjdaeuj. Gou yawj-yawj seiqhenz, gyoengqvunz ca mbouj lai bouxboux cungj yawj gou.

Gou ndawsim siengj, ngoenzneix gou vutnaj lai lo. Ndigah, ngoenzde gou cungj mbouj miz simgei hag youzraemx.

Ngoenz daihngaih, daxboh coi gou bae hag youzraemx, gou naeuz: “Gou mbouj haengj bae gizhaenx ne!” Daxboh lumj yawj rox gij simgei gou, doiq gou naeuz: “Siengj hag rox hag ndei youzraemx, couh giemhaw di, mbouj dwg miz coenz vah ndeu naeuz ‘giemhaw sawj vunz cinbu’ ma.” Gou lumjbaenz rox eiqsei coenz vah neix lo, sikhaek bae hag youzraemx. Ngoenz ndeu, song ngoenz…… aen singhgiz he gvaqbae lo, gou ngoenz



beij ngoenz hag ndaej ndei. Gyaulen doiq gou naeuz: “Mwngz caen coengmingz, ngamq hag geij ngoenz couh hag ndaej baenz ndei!” Gou ndawsim gig angq, nyaenx mbouj ndaej riu lo.

Ginglig hag youzraemx hawj gou rox aen dauhleix he: Giemhaw cijndaej hag daengz bonjsaeh, cijndaej guh ndei moix gienh saeh.

(seiq neinzgaep Cau Gyahloh)

Faexva' gveiq

桂花树

Youq gyanghongh ranz mehheiz, miz go faexva' gveiq sanghung ndeu. Daj gyae muengh bae, lumj duj raet hung ndeu. Byaij gyawj sijsaeq ngonz, mbawfaex heusoemsoem haenx, mbehai coh seiqmienh, lumj-baenz cengqhai aen liengj hung ndeu.


Gwnz nyefaex deihdwddwd haenx, maj miz gij mbaw saek heugeq, mbaw dep mbaw. Gou sijsaeq cazyawj, fatyienh miz mbangj gaenq did ok mbaw moq, oiqsubsub; miz mbangj gwnz nyefaex did ok gij ngaz iq saek henjoiq haenx, de lumjbaenz deq mbouj gib siengj iet gyaeuj okdaeuj yawj, yawjyawj aen seiqgyaiq gyaeundeix neix.

Duzroeg douh youq gwnz nye-faex, heuhceuceu, lumjbaenz cingq ciengq gij go ndei dingq nei.

Gou dinghdingh ndwn youq laj go faexva' gveiq, ngonz mbawfaex heu, dingq duzroeg heuh, lumjbaenz yawjraen seizcou gimhenj haenx, gij vahenj iq hai rim baenz go faex haenx, duzrwi mbin daeuj aeu dangz, duzmbaj hix mbin daeuj, heux dujva diuqfoux, gyaeundeix raixcaix.

Neix dwg go faexva' gveiq mwn-cupcup ndeu, go faex maezvunz ndeu!

(bouxij Denz Lingyiz boux-hoiz Goenggen)



Singgeiz neix, lauxsae heuh dou guh aen cozyez ndeu—youq ranz cauj yiengh byaek ndeu, caiq dawz ginggvaq sij roengzdaeuj. Mwh yawj daengz aen cozyez neix, gou doeksaet liux, sim naemj: Gou mbouj rox cauj byaek bw! Vihmaz lauxsae heuh dou guh aen cozyez neix ne? Gou daiq dwk ngeizvaeq yawj coh lauxsae, hoeng lauxsae gaenbonj mbouj fatyienh gou, gou saetmuengh liux, mboujgvaq, cungj mbouj naengz mbouj guh cozyez ba!

Ma ranz le, mbouj miz banhfap, gou cijndaej gietdingh youq singgeizroek cauj yiengh byaek ndeu lo.

Ngoenz singgeizroek, gou hwnqmbonq le, couh bae sij cozyez lo, hoeng aenvih cozyez noix gou gig vaiq couh guh sat lo, cij lw cauj byaek aen cozyez neix caengz guh lo. Gou gig mbouj cingznyienh bae daengz fuengzdajcawj, doq byaij doq naemj: Cauj gijmaz ndei ne? Doeklaeng, gou gietdingh guh makyungz cauj gyaeqgaeq yiengh byaek neix. Gou sien dawz song aen makyungz, sam aen gyaeqgaeq caeuq song aen vanj daeuj, yienz-haeuh couh doengh goeng lobw. Daih' it, gou ronq makyungz gonq, dawz makyungz ronq baenz baenz-naed iq, yienzhaeuh coux haeuj

aenvanj bae; riengzlaeng, dawz sam aen gyaeqgaeq dub roengz aenvanj wnq bae, roengz gyue, hoed yinz; doeklaeng, hai feiz ndat rek le ndingq lau roengz gonq, yienz-haeuh ndingq gyaeqgaeq roengz, caiq ndingq makyungz roengzbae, fan cauj geij baez, hai feiz iq caiq cauj yaep ndeu, ndaep feiz, daek hwnj, deb byaek makyungz cauj gyaeqgaeq ndeu couh cauj ndei lo. Gwnngaiz seiz, gou gwn gij byaek bonjfaenh cauj haenx, ndawsim roxnyinh vuenyungz dangqmaz.

Cauj byaek caen mizyinx ha.

(bouxij Lij Minz bouxhoiz Ouh Caijfangh)

